



## Puluhan ribu rakyat menyambut Dr Mahathir penuh mesra

**LAMBAIAN** tangan dan senyuman mesranya menunjukkan kepuasan. Sebagai pemimpin ulung negara, Datuk Seri Dr Mahathir Mohamad pasti berbangga dengan sambutan yang diberikan oleh puluhan ribu penduduk Wilayah Persekutuan sempena lawatannya, semalam (gambar kiri sekali).

Walaupun banyak lagi tugas penting, demi kesejahteraan rakyat dan keamanan negara, khususnya berhubung dengan penyelesaian isu pindaan Perlembagaan, sokongan bulat rakyat dari segenap lapisan dapat membantu meringankan beban Perdana Menteri.

"Hidup Mahathir! Hidup Mahathir!" bergema di Stadium Jalan Raja Muda, Kuala Lumpur. Bagi penduduk-penduduk Wilayah Persekutuan, panas terik tidak dihiraukan asalkan mereka dapat membuktikan sokongan kepada pemimpin tercinta (gambar atas).

Laungan mereka disambut dengan lambaian tangan Perdana Menteri dan Ketua Umno Bahagian Setapak, Haji Idris Ibrahim.

Sejak tengah hari mereka telah mula berkumpul dengan membawa berbagai sepaduk, poster dan bendera — dari ahli-ahli dan penyokong parti politik hingga kakitangan kerajaan dan pekerja swasta, penaja dan pemandu teksi.

"Kami menyokong pimpinanmu", begitulah laungan anggota-anggota Pergerakan Pemuda dan Wanita Umno Wilayah Persekutuan yang menyertai perhimpunan ramai menyambut Perdana Menteri (gambar bawah).

Lawatan Datuk Seri Dr Mahathir ke ibu negara adalah sebahagian daripada siri penerangan mengenai pindaan kepada Perlembagaan Negara setelah beliau melawat hampir semua negeri di Semenanjung dan Sarawak sejak dua bulan lalu.

— Foto-foto Berita Minggu oleh Yusof Omar, Khalid Redza, F.K. Tham dan Anwar Hashim.

Bahan asal dari Arkib Negara Malaysia

